

# INUIT ATAQATIGIIT

## INATSISARTUNI



Nuuk, 20. april 2012

Inatsisarut suleriaasianni § 37 naapertorlugu matumuuna imaattunik Naalackersuisunut apeqquteqarpunga:  
(Inatsisartunut Ilaasortaqaq Debora Kleist, Inuit Ataqatigiit)

### Apeqqutit:

1. Artic Green Food Nunatta kujataani aalisakkariviinut tulaassuisinnaanermut akuer-sissummik tunineqarsimasut qassiuppat aammalu maannakkut qassit ingerlappat?
2. Ukioq kingulleq Artic Green Food-p ingerlatai tunitsivigineqarnissamik akuerine-qarsimasut, taamaasillutillu kiffartuussinissamik isumaqatigiissuteqarfigineqarsimasut, ajoraluartumillu ullumikkumut sulii ammarneqanngitsut Naalackersuisuniit qanoq pilersaarusiortfiginiarneqarpat?
3. Kiffartuussinissamik isumaqatigiissuteqarnerup atsiorneqarnerata kingunerisaanik AGF-mut pisussaaffiliinnginerluni nunaqarfinni tunitsiviit ammarneqarnissaanik? Soorlu Nanortallip eqqaani Aappilattuni tunitsivik siorna augutsimili ammarneqartussaagaluaq, ajuusaarnaqisumik sulii matoqqavoq.
4. Siunissami kujataani nunaqarfinni tunitsiviit AGF-miit aammalu namminersortunik pigineqartut qanoq pilersaarusiortfigineqarniarpat?
5. Ukioq kingulleq 1500,00 kr-nit akiliutaasimasooq, assersuutigalugu Aappilattuni tunitsiveqannginneq allamillu periarfissaqannginneq tunngavigalugit akiliutaasimasooq maangaannartinneqarpoq. Ukioq kingulleq akiliutaasimasooq ukioq mannamut akiliutitut immikkut akuersinikkut periarfissinneqarsinnaanerluni?

### Tunngavilersuut

Inuit Ataqatigiit isumaqarpugut Nunarput tamaat isigalugu pitsanngorsaataasunik suliniuteqartuarnissaq pingaartuusoq.  
Sinerissami piffinni ataasiakkaani periarfissarititaasut atorluarniarneritigut aammalu nutaaliornikkut ineriartortitsineq anguniartuartaqarpoq.

Taamaattumik isumaqarpunga Nunatta kujaterpiaani aalisarnermik piniarnermillu ingerlatsisut, sulii pitsaanerumik ineriartortitsivigineqartariaqartut. Tassanilu ilaatigut piffinni tunitsiveqarnissaq, saniatigullu suliffiusinnaasunik pilersitsisinnaaneq pingaaruteqarpoq. Ulluinnarni inuuniarneq suliffisaqartitsiniarnerlu eqqarsaatigalugit, peqatigiilluni kivitseqatigiinnissaq, akisussaaqatigiinnissarlu pingaarluinnartuummat.

Kujataani suliffissaaleqiffioqisumi, suliffissanik aammalu aningaasatigut pitsaanerumik patajaannerumillu ingerlatsinissamut suliniuteqarnissaq, annertuumik pingaaruteqartutut isigaara. Annertuumik inunnik isumaginninneq aqutugalugu Kommunemut nammakkiissanngippat arlaatigut nammineq pilersorsinnaaneq anguniartariaqarpoq.

Ilisimavarpummi kujataani nunaqarfiit ullumikkut allanik suliffissatigut periarfissaat annertugisassaangitsut. Taamaattumik Nunatta kujataani illoqarfinni nunaqarfinnilu aalisarnermik piniarnermillu inuussutissarsiortunut tunitsiveqarsinnaaneq pingaarluinnarpoq. Soorlu assersuutigalugu Aappilattumi tunitsiviup ukioq kingullerlu augustimi

ammarneqarnissaanut aalajangiisimaneq piviusunngortariaqartoq. Maannakummi aamma qaavatigut amminik tunisineq qaammatini marlunni uninneratigut ingallutik aningaasarsiorfissaaleqileqinerat annertusivoq. Tamannalu aalisartunik piniartunillu illuminniit anisitaanissaminnik erumassuteqarnerannik aammattaaq kinguneqarpoq, tassami akiligassat takkuttuartut malinnaavigisinnaanginnamikkitt. Kommunelu aningaasatigut ajornartorsioreeqisoq imaaliallaannaq ikiorsiinissaa ilimanaateqanngimmat.